



## სრკ-ს სადისციპლინო რეგულაცია

### 1. შესავალი

- 1.1 წინამდებარე რეგულაცია ჩამოყალიბებულია მსოფლიო რაგბის მოქმედი შესაბამისი რეგულაციების ფუნდამენტური პრინციპების დაცვით და სრკ-ს მიერ ორგანიზებული შეჯიბრებების, საშეჯიბრო სტრუქტურების სპეციფიკისა და არსებული კანონმდებლობის სპეციფიკის გათვალისწინებით.
- 1.2 სრკ-ს სადისციპლინო რეგულაცია მიზნად ისახავს პატიოსანი თამაშის პრინციპების მხარდაჭერას და პოპულარიზაციას, მოთამაშეთა ჯანმრთელობის და კეთილდღეობის დაცვას, რაგბის თამაშის წესების და/ან ქცევის კოდექსის დარღვევის და/ან არამართებული ქცევის ინციდენტებზე ოპერატიულად და სათანადოდ რეაგირებას, თამაშის იმიჯისა და რეპუტაციის ზიანისგან დაცვას.
- 1.3 წინამდებარე რეგულაციას საფუძვლად უდევს ჰარმონიული მიდგომა თამაშის ყველა დონეზე სადისციპლინო ნორმების დაცვისა და რაგბის თამაშის წესების, ქცევის კოდექსის დარღვევასთან ან არამართებულ ქცევასთან დაკავშირებული სანქციების გატარებისადმი. რეგულაცია მიზნად ისახავს სადისციპლინო ნორმების გატარებაში თანმიმდევრულობის მიღწევას და თამაშის წესების, ქცევის კოდექსის დარღვევის ან არამართებული ქცევის ინციდენტების სერიოზულობის შეფასებასა და სანქციების დაკისრებაში, ერთგვაროვანი მიდგომის უზრუნველყოფას. რეგულაციის საბოლოო მიზანია სადისციპლინო პროცესის ბუნებრივი სამართლის ფუნდამენტურ პრინციპებთან შესაბამისობაში მოყვანა.
- 1.4 სრკ-ს იურისდიქციის ფარგლებში რაგბის თამაშის ყველა მონაწილე ვალდებულია, თავისი როლის მიუხედავად, დაემორჩილოს წინამდებარე რეგულაციას და აღიაროს მისი ფუნდამენტური პრინციპი - უნივერსალურობა, რომელიც უზრუნველყოფს სრკ-ს იურისდიქციის ფარგლებში რაგბის თამაშის ყველა დონეზე, მოთამაშისადმი და/ან პიროვნებისადმი და/ან სრკ-ს წევრი სუბიექტისადმი გამოყენებული სანქციების გატარებას.

### 2. ტერმინთა განმარტება:

წინამდებარე რეგულაციაში მხოლოებითი მნიშვნელობის სიტყვები მოიცავს მრავლობითსაც და პირიქით.

**2.1 მსოფლიო რაგბი** - რაგბის თამაშის მსოფლიო მმართველი ორგანო.

**2.2 სრკ** - საქართველოს რაგბის კავშირი.

**2.3 თამაშის წესები** - მსოფლიო რაგბის მიერ შესაბამისი დებულებით დადგენილი რაგბის თამაშის მოქმედი წესები.

**2.4 დისციპლინარული დარღვევა** - ამ რეგულაციით განსაზღვრული თამაშის წესების და/ან ქცევის კოდექსის დარღვევის და/ან არამართებული ქცევის ინციდენტი.

**2.5 ქცევის კოდექსი და/ან არამართებული ქცევა** - სათამაშო სივრცეში და მის მიღმა, მოთამაშეებისათვის და პიროვნებებისათვის, წინამდებარე რეგულაციით განსაზღვრული ქცევის ნორმები და არამართებული ქცევა.



**2.6 სრკ-ს წევრი სუბიექტი (სარაგბო ორგანო)** - სარაგბო - კლუბი, ორგანიზაცია, ასოციაცია, საზოგადოება და სხვა იურიდიული პირი, რომელიც შედგება რაგბის გუნდის ან გუნდებისგან და მონაწილეობს სრკ-ს მიერ ორგანიზებულ შეჯიბრებებში ან მატჩში ნებისმიერ დონეზე.

**2.7 სრკ-ს წევრი პირი** - სრკ-ს და მისი სტრუქტურების საქმიანობაში ჩართული ნებისმიერი პირი.

**2.8 სათამაშო სივრცე** - არენა/სტადიონი, მის ტერიტორიაზე არსებული შენობა ნაგებობები და სათამაშო მოედნები, სადაც იმართება სრკ-ს მიერ ორგანიზებული ნებისმიერი დონის შეჯიბრება.

**2.9 მატჩის ოფიციალური პირები** - სრკ-ს მიერ ორგანიზებულ, ნებისმიერი დონის შეჯიბრებაზე ან მატჩზე, სრკ-ს სტრუქტურების მიერ დანიშნული - მსაჯები, მატჩის მეთვალყურე, საითინგ კომისარი ან მისი ლიეიზონ ოფიცერი, მატჩის ოფიციალური ვიდეოოპერატორები, კომენტატორები და სხვა ოფიციალურად დანიშნული პირები.

**2.10 მოთამაშე/მორაგბე** - სრკ-ს იურისდიქციის ქვეშ მყოფი და სრკ-ს წევრი სუბიექტის მიერ გუნდის საშეჯიბრო და თამაშის განაცხადში შეყვანილი რაგბის მოთამაშე.

**2.11 პიროვნება** - პირი, რომელიც არის ან იყო ოდესმე ჩართული რაგბში ნებისმიერ დონეზე: სრკ-ს წევრი, მწვრთნელი, სამედიცინო პირი, ფიზიოთერაპევტი, მსაჯი, სელექციონერი, მეთვალყურე, მოთამაშე/მორაგბე, სრკ-ს წევრი სუბიექტების საქმიანობაში ჩართული ნებისმიერი პირი.

**2.12 სრკ-ს სადისციპლინო სამსახური** - სრკ-ს შესაბამისი რეგულაციებით განსაზღვრული დისციპლინარული დარღვევების, განმხილველი სტრუქტურა.

**2.13 სადისციპლინო პერსონალი** - სრკ-ს სადისციპლინო კომისიის წევრები, სრკ-ს სააპელაციო კომისიის წევრები, საითინგ კომისრები, ლიეიზონ ოფიცრები .

**2.14 საფესტივალო ასაკის სადისციპლინო კომისია** - წინამდებარე რეგულაციით განსაზღვრული წესებით დანიშნული და მოქმედი კომისია, რომელიც განიხილავს, იღებს შესაბამის გადაწყვეტილებებს და აკისრებს სანქციებს, თამაშის წესების ან ქცევის კოდექსის დარღვევის და არამართებული ქცევის ინციდენტებზე, მოთამაშეებს, პიროვნებებს და სრკ-ს წევრ სუბიექტებს მხოლოდ საფესტივალო დონის მატჩებზე.

**2.15 სადისციპლინო კომისია** - წინამდებარე რეგულაციით განსაზღვრული წესებით დანიშნული და მოქმედი კომისია, რომელიც განიხილავს, იღებს შესაბამის გადაწყვეტილებებს და აკისრებს სანქციებს, თამაშის წესების ან ქცევის კოდექსის დარღვევის და არამართებული ქცევის ინციდენტებზე, მოთამაშეებს, პიროვნებებს და სრკ-ს წევრ სუბიექტებს.

**2.16 სააპელაციო კომისია** - წინამდებარე რეგულაციით განსაზღვრული წესებით დანიშნული და მოქმედი კომისია, რომელიც განიხილავს და იღებს შესაბამის გადაწყვეტილებებს, სადისციპლინო კომისიის მიერ მიღებული გადაწყვეტილებების გასაჩივრების შემთხვევაში რომელიმე მხარის მიერ.

**2.17 საითინგ კომისარი** - სრკ-ს მიერ ორგანიზებულ, ნებისმიერი დონის შეჯიბრებაზე ან მატჩზე, სრკ-ს სადისციპლინო სამსახურის მიერ დანიშნული, სათანადო კვალიფიკაციის მქონე მატჩის ოფიციალური პირი, რომელიც მოქმედებს წინამდებარე დებულებით განსაზღვრული წესებით.

**2.18 ლიეიზონ ოფიცერი** - სრკ-ს მიერ ორგანიზებულ, ნებისმიერი დონის შეჯიბრებაზე ან მატჩზე სრკ-ს სადისციპლინო სამსახურის მიერ დანიშნული, სათანადო კვალიფიკაციის მქონე მატჩის ოფიციალური პირი, რომელიც მოქმედებს წინამდებარე დებულებით განსაზღვრული წესებით.

**2.19 სანქცია** - საფესტივალო ასაკის სადისციპლინო კომისიის, სრკ-ს სადისციპლინო კომისიის და/ან სრკ-ს სააპელაციო კომისიის მიერ წინამდებარე რეგულაციით განსაზღვრული წესების



დაცვით მიღებული და გადაწყვეტილებით განსაზღვრული, მოთამაშისთვის, პიროვნებისთვის, სრკ-ს წევრი სუბიექტისათვის კვირებით ან გარკვეული პერიოდით რაგბთან დაკავშირებული საქმიანობის აკრძალვა/შეზღუდვა (დისკვალიფიკაცია) და/ან ფულადი ჯარიმების დაწესება.

### 3. ფუნდამენტური პრინციპები

3.1 ფუნდამენტური პრინციპების დაცვა სავალდებულოა რაგბის თამაშის ნებისმიერ დონეზე, წინამდებარე რეგულაციით განსაზღვრული თამაშის წესების და/ან ქცევის კოდექსის დარღვევასთან და/ან არამართებულ ქცევასთან დაკავშირებული სადისციპლინო რეგულაციების გატარებისას.

3.2 სანქციები - თამაშის წესების და/ან ქცევის კოდექსის დარღვევისათვის და/ან არამართებული ქცევისთვის, ვრცელდება თამაშის ყველა დონეზე. სრკ, მისი იურისდიქციის ფარგლებში გამართული შეჯიბრებების, საშეჯიბრო სტრუქტურების სპეციფიკისა და არსებული კანონმდებლობის სპეციფიკის გათვალისწინებით, აწესებს მსოფლიო რაგბის შესაბამისი რეგულაციების ფუნდამენტური პრინციპების დაცვით მიღებულ სანქციებს, თამაშის წესების, ქცევის კოდექსის დარღვევისთვის და/ან არამართებული ქცევისთვის და უზრუნველყოფს მათ გატარებას მისდამი დაქვემდებარებულ ტერიტორიაზე, წინამდებარე რეგულაციის დანართი#1-ის, დანართი#2-ის, დანართი#3-ის, და დანართი#4-ის, შესაბამისად.

3.3 შესაბამისი დანართების ფარგლებში გამოტანილი სანქციების ხანგრძლივობა, როგორც წესი, განისაზღვრება წინამდებარე დებულების 14.2 პუნქტის კრიტერიუმების შესაბამისი კვირების გარკვეული რაოდენობით. სადისციპლინო სანქციის მოქმედების პერიოდში, დასჯილ მოთამაშეს/ პიროვნებას ეკრძალება რაიმე დონეზე თამაშში მონაწილეობა.

3.4 წინამდებარე რეგულაციის მე-12, მე-13 და მე-14 მუხლებში, სადისციპლინო სასჯელების განსაზღვრის და გატარების პროცესი თამაშის წესების დარღვევისას, სტრუქტურულად უცვლელია, სრკ-ს მიერ ორგანიზებული ნებისმიერი დონის შეჯიბრისთვის და/ან მატჩისთვის.

3.5 ყველა სადისციპლინო განხილვაში დაცული უნდა იყოს ბუნებრივი სამართლის პრინციპები. ამ პრინციპების შესაბამისად, თამაშის წესების ან ქცევის კოდექსის დამრღვევ და არამართებული ქცევის მონაწილე ყველა მოთამაშეს, პიროვნებას, უფლება აქვს იცნობდეს მის წინააღმდეგ არსებულ სამხილს, გამოთქვას თავისი პოზიცია, იყოლიოს დამცველი, მისცეს ჩვენება და დაიცვას თავი საფესტივალო ასაკის სადისციპლინო კომისიის, სადისციპლინო ან სააპელაციო კომისიის წინაშე.

3.6 მოთამაშეს/პიროვნებას ეკრძალება რაგბთან დაკავშირებულ ნებისმიერ აქტივობაში მონაწილეობა, მის მიმართ წარმოებული სადისციპლინო საქმის განხილვის დასრულებამდე.

3.7 წინამდებარე რეგულაცია ერთნაირად ეხება სრკ-ს მიერ ორგანიზებულ ნებისმიერი დონის შეჯიბრებებში ან მატჩებში, როგორც თხუთმეტკაცა და შვიდკაცა რაგბს, ისე რაგბის სხვა ადაპტირებულ სახეობებს.



#### 4. თამაშის წესების დარღვევა

4.1 მსოფლიო რაგბის მიერ დადგენილი მოქმედი თამაშის წესების დარღვევა, სრკ-ს მიერ ორგანიზებულ ნებისმიერი დონის შეჯიბრზე და/ან მატჩზე, რეგულირდება წინამდებარე რეგულაციის **დანართი 1-ს** და **დანართი 4-ის** შესაბამისად.

#### 5. ქცევის კოდექსი და არამართებული ქცევა

##### ქცევის კოდექსი

მოთამაშე/პიროვნება/სრკ-ს წევრი სუბიექტი, ვალდებულია:

- 5.1 იზრუნოს იმაზე, რომ რაგბის თამაში წარიმართოს დისციპლინის და სპორტული ქცევის პრინციპების დაცვით; გააცნობიეროს, რომ ამ პრინციპების დაცვა არ არის მხოლოდ მატჩის ოფიციალური პირების მოვალეობა;
- 5.2 ხელი შეუწყოს რაგბის თამაშის წესების დაცვას და არ დაუშვას მოედანზე თამაშის წესების დარღვევაში შემჩნეული მოთამაშეები;
- 5.3 არ ჩაიდინოს რაგბის თამაშის წესების მრავლობითი დარღვევა;
- 5.4 აღიაროს მატჩის ოფიციალური პირების ავტორიტეტი და დაემორჩილოს მათ გადაწყვეტილებებს;
- 5.5 საჯაროდ არ გააკრიტიკოს / ხელი არ შეუწყოს მატჩის ოფიციალური პირების მიერ მატჩის დროს მიღებული გადაწყვეტილებების საჯარო კრიტიკას;
- 5.6 საჯაროდ არ გააკრიტიკოს / ხელი არ შეუწყოს - საფესტივალო ასაკის სადისციპლინო კომისიის, სრკ-ს სადისციპლინო ან სააპელაციო კომისიების მიერ თამაშის წესების და/ან ქცევის კოდექსის დარღვევასთან და არამართებულ ქცევასთან დაკავშირებით საქმის წარმართვის ან გამოტანილი გადაწყვეტილებების საჯარო კრიტიკას;
- 5.7 არ მოიქცეს და/ან არ მიიღოს მონაწილეობა რაიმე ქცევაში და/ან აქტივობაში სათამაშო სივრცეში ან მის მიღმა, რომელმაც შეიძლება ზიანი მიაყენოს საზოგადოების რწმენას სრკ-ს მიერ ორგანიზებული შეჯიბრებების და/ან ცალკეული მატჩების პატიოსნად და ორგანიზებულად წარმართვაში (მ.შ. პირდაპირ ან არაპირდაპირ გადასცეს რაგბთან დაკავშირებული ინფორმაცია ბუკმეკერებს და პიროვნებებს, რომლებსაც შეუძლია ასეთი ინფორმაციის საკუთარი თავის სასარგებლოდ გამოყენება) და/ან რაგბთან კავშირის მქონე რომელიმე პიროვნების პატიოსნებაში და დადებით თვისებებში;
- 5.8 არ დაარღვიოს სრკ-ს მოქმედი რეგულაციები, დებულებები, წესდება, სრკ-ს გამგეობის სხდომის მიერ მიღებული გადაწყვეტილებები;
- 5.9 არ დაარღვიოს მსოფლიო რაგბის მე-6 რეგულაცია (**ანტიკორუფციული, გარიგება, შიდა ინფორმაციის გასაჯაროება და/ან მესმე პირისთვის გადაცემა/ აკრძალული ფსონის დადება**);
- 5.10 ხელი შეუწყოს თამაშის იმიჯის ამაღლებას და მიიღოს ყველა შესაძლო ზომა, რათა არ მოხდეს მისი შებღალვა;
- 5.11 არ დაარღვიოს ანტიდოპინგის წესები
- 5.12 არ მიაყენოს შეურაცხყოფა და/ან დაემუქროს მატჩის ოფიციალურ პირებს და/ან საფესტივალო ასაკის სადისციპლინო კომისიის და/ან სადისციპლინო და სააპელაციო კომისიის წევრებს, იქნება ეს სათამაშო სივრცეში თუ მის მიღმა;
- 5.13 არ გამოიყენოს უხეში ან შეურაცხმყოფელი ლექსიკა მატჩის ოფიციალურ პირების, მოთამაშეების, პიროვნებების, და/ან მაცურებლის მიმართ;



5.14 არ ჩაიდინოს ისეთი საქციელი, რომელიც გამოიწვევს ნებისმიერი პირის დაშინებას, შეურაცხყოფას, დამცირებას თუ დისკრიმინაციას რელიგიის, სქესის, სექსუალური ორიენტაციის, კანის ფერის, ეროვნების ან ეთნიკური ნიშნით;

5.15 არ ჩაიდინოს ისეთი საქციელი, რომელიც უარყოფით გავლენას მოახდენს სრკ-ზე და/ან რაგბის კომერციულ პარტნიორზე.

5.16 სათანადოთ შეასრულოს სრკ-ს და/ან სრკ-ს სტრუქტურების მიერ, ხელშეკრულებით და/ან დებულებით დაკისრებული მოვალეობები.

### არამართებული ქცევა

5.17 „არამართებული ქცევა“ გულისხმობს მომხდარ ნებისმიერ ქცევას, განცხადებას და/ან ქმედებას სათამაშო სივრცეში ან მის მიღმა, რომელიმე კონკრეტულ თამაშთან კავშირში ან კავშირის გარეშე, რომელიც: არასპორტულია, თაღლითურია, არღვევს არსებულ წესებს, უდისციპლინობის გამოვლინებაა და/ან ზიანს აყენებს რაგბს, სრკ-ს და მის რომელიმე სტრუქტურას, სრკ-ს წევრ სუბიექტებს და სრკ-ს სტრუქტურების საქმიანობაში ჩართული ნებისმიერი პირების და/ან რაგბის კომერციული პარტნიორების და/ან მატჩის ოფიციალურ პირთა და/ან სადისციპლინო პერსონალის რეპუტაციას.

5.18 ვინაიდან შეუძლებელია არამართებული ქცევის / განცხადებების / ქმედებების ტიპების ამომწურავი სიის შედგენა, რომელიც დაერთვებოდა წინამდებარე რეგულაციას, მაგალითის სახით წარმოგიდგენთ სხვადასხვა სახის ქცევის / განცხადებების / ქმედებების ნუსხას, რომლებიც შეიძლება ჩაითვალოს არამართებულად:

- ა) ვინმეს მიმართ ძალადობა თუ დაშინება სათამაშო სივრცეში ან მის მიღმა.
- ბ) აგდებული, დამამცირებელი და/ან აგრესიული დამოკიდებულება მატჩის ოფიციალური პირების, სადისციპლინო პერსონალის, სრკ-ს წევრების, პიროვნებების ან მაცურებლების მიმართ;
- დ) სიტყვიერი თუ ქმედითი დისკრიმინაცია რელიგიის, რასის, სქესის, სექსუალური ორიენტაციის, უნარების, კანის ფერის თუ ეროვნების ან ეთნიკური წარმოშობის ნიშნით;
- ე) მსოფლიო რაგბის მე-ნ რეგულაციის (ანტიკორუფციული, გარიგება, შიდა ინფორმაციის გასაჯაროება და/ან მესმე პირისთვის გადაცემა/ აკრძალული ფსონის დადება) ნებისმიერი დარღვევა;
- ვ) სადისციპლინო საქმის განხილვაში ჩართული მოთამაშის და/ან პიროვნების სადისციპლინო ისტორიის თაობაზე ან სამომავლო სათამაშო გეგმებზე არაზუსტი და/ან ყალბი ინფორმაციის მიწოდება;
- ზ) წინამდებარე რეგულაციით განსაზღვრული ქცევის კოდექსის ნებისმიერი დარღვევა;
- თ) მიმდინარე თუ დაგეგმილ სადისციპლინო საქმის განხილვასთან თუ მსაჯობასთან დაკავშირებული კომენტარები და/ან ქცევა, რომელიც შეიძლება იყოს მიკერძოებული ან გავლენა მოახდინოს სადისციპლინო პროცედურების ან მსაჯობის მსვლელობაზე და ზიანი მიაყენოს თამაშის ინტერესებს და/ან რომელიმე პიროვნებას და/ან სადისციპლინო პერსონალს;



ი) საითინგ კომისართან, ლიეიზონ ოფიცერთან და/ან სადისციპლინო პროცესთან თანამშრომლობაზე უარის თქმა;

კ) მოთამაშის, პიროვნების, სრკ-ს წევრის უარი მსოფლიო რაგბის მე-6 რეგულაციასთან (ანტიკორუფციული, გარიგება, შიდა ინფორმაციის გასაჯაროება და/ან მესმე პირისთვის გადაცემა/აკრძალული ფსონის დადება ) დაკავშირებული ან ანტიდოპინგური წესის დარღვევებთან დაკავშირებულ ან სადისციპლინო კომისიის და სააპელაციო კომისიის მიერ განსახილველ სხვა გამოძიებებში მონაწილეობაზე; და/ან

ლ) თამაშის და/ან მასში არსებული რომელიმე სტრუქტურის, სრკ-ს და/ან მისი რომელიმე სტრუქტურის ან წევრის, სრკ-ს წევრი სუბიექტების და/ან კომერციული პარტნიორის და/ან მსაჯების და/ან მეთვალყურეების და/ან სადისციპლინო პერსონალის მიმართ დამამცირებელი ან დამაკნინებელი კომენტარების გაკეთება (მ.შ. მედიაში).

5.19 სრკ და მის იურისდიქციის ფარგლებში მყოფი ყველა სრკ-ს წევრი სუბიექტები პასუხისმგებელნი არიან თავიანთი მოთამაშეების და მათი წევრი ყველა პირის დისციპლინირებულ ქცევაზე და ვალდებულნი არიან უზრუნველყონ მათ მიერ სადისციპლინო რეგულაციების დაცვა.

5.20 ქცევის კოდექსის დარღვევა და არამართებული ქცევა, რეგულირდება წინამდებარე რეგულაციის დანართი#2-თ განსაზღვრული შესაბამისი სანქციებით.

## **6. საითინგ კომისარი და მისი ლიეიზონ ოფიცერი დანიშვნის წესი და ფუნქციები**

6.1 საითინგ კომისარებს და მათ ლიეიზონ ოფიცრებს, სრკ-ს მიერ ორგანიზებულ ნებისმიერი დონის პირველობის მატჩებზე ან სხვა ნებისმიერი დონის მატჩზე, შეხედულებისამებრ ნიშნავს სრკ-ს სადისციპლინო სამსახური.

6.2 საითინგ კომისარი უფლებამოსილია დააფიქსიროს თამაშის წესების დარღვევის ნებისმიერი ინციდენტი, რისთვისაც, საითინგ კომისარის აზრით, მოთამაშე მოედნიდან თამაშის ბოლომდე გაძევებას იმსახურებდა (წითელი ბარათი).

6.3 საითინგ კომისარი უფლებამოსილია დააფიქსიროს თამაშის წესების დარღვევის ნებისმიერი ინციდენტი, რომელიც შემჩნეული უნდა ყოფილიყო მატჩის მთავარი მსაჯის ან ასისტენტი მსაჯის ან მეთვალყურის მიერ და რომელზეც მათ რეაგირება უნდა მოეხდინათ. საითინგ კომისარს არა აქვს უფლება დააფიქსიროს თამაშის წესების დარღვევის ისეთი ინციდენტი, რომლის გამოც მოთამაშე გაძევებული იქნა მოედნიდან წითელი ბარათით, გარდა იმ შემთხვევებისა, როდესაც მოედნიდან თამაშის ბოლომდე გაძევება ხდება ორი ყვითელი ბარათის მიღების შედეგად. ამ შემთხვევაში, მოთამაშის საითინგი შეიძლება მოხდეს თამაშის წესების დარღვევის იმ ინციდენტების გამოც, რომლების შედეგადაც მან ერთერთი ან ორივე ყვითელი ბარათი მიიღო.

6.4 საითინგ კომისარი უფლებამოსილია გაფრთხილება მისცეს მოთამაშეს, რომელიც, მისი აზრით, დამნაშავეა თამაშის წესების დარღვევის გამო, მაგრამ არ იქნა გაძევებული მოედნიდან წითელი ბარათით, რადგანაც გარემოებები, რომელიც თან სდევდა თამაშის წესების დარღვევის ინციდენტს, არ ითვალისწინებდა მორაგბის მოედნიდან დროებით ან თამაშის ბოლომდე გაძევებას.

6.5 საითინგ კომისარი მოქმედებს მატჩზე დანიშნული სხვა ოფიციალური პირებისგან დამოუკიდებლად.

6.6 იმ შემთხვევაში, თუ საითინგ კომისარი მატჩს არ ესწრება, ადგილზე უნდა იმყოფებოდეს სათანადო კვალიფიკაციის მქონე საითინგ კომისარის ლიეიზონ-ოფიცერი, რომელსაც შეუძლია შესაბამის ვადებში



მიაწოდოს საითინგ კომისარს სათანადო ინფორმაცია და მხარდამჭერი მონაცემები, რომლებიც დაეხმარება საითინგ კომისარს თავისი მოვალეობების შესრულებაში ან თვითონ შეასრულოს საითინგ კომისარის მოვალეობები.

6.7 საითინგ კომისარი და/ან მისი ლიეიზონ ოფიცერი, უფლებამოსილია დააფიქსიროს, წინამდებარე რეგულაციით განსაზღვრული, მოთამაშის ან პიროვნებების მხრიდან, სავარაუდო ქცევის კოდექსის დარღვევის ან არამართებული ქცევის ნებისმიერი ფაქტი.

6.8 საითინგ კომისარი და/ან მისი ლიეიზონ ოფიცერი წინამდებარე რეგულაციით დამტკიცებული ფორმა 1 -ის მეშვეობით აწვდის სრკ-ს სადისციპლინო ტრიბუნალს სათანადო ინფორმაციას და მხარდამჭერ მონაცემებს, მოთამაშეების და პიროვნებების მხრიდან სავარაუდოდ მომხდარი თამაშის წესების დარღვევის და/ან ქცევის კოდექსის დარღვევის და/ან არამართებული ქცევის ინციდენტების შესახებ, 48(ორმოცდარვა) საათის განმავლობაში იმ მატჩის დასრულებიდან, რომლის დროსაც ადგილი ჰქონდა აღნიშნულ ინციდენტებს.

6.9 საითინგ კომისარის და/ან მისი ლიეიზონ ოფიცერის მიერ აღნიშნული, სავარაუდო თამაშის წესების დამრღვევი და/ან ქცევის კოდექსის დამრღვევი და/ან არამართებული ქცევის ჩამდენი მოთამაშე/პიროვნება არ ითვლება რამენაირად შეზღუდულად, სრკ-ს სადისციპლინო კომისიის მიერ საჩივარის განხილვის დაწყების დადასტურებამდე.

## 7. პიროვნების უფლებები-მოვალეობები

7.1 წინამდებარე რეგულაციით განსაზღვრული პიროვნებები ვალდებულები არიან: ითანამშრომლონ საითინგ კომისართან, მის ლიეიზონ ოფიცერთან და სადისციპლინო პერსონალთან, მიაწოდონ მათ სათანადო ინფორმაცია და მხარდამჭერი მონაცემები, სავარაუდო თამაშის წესების დარღვევის და ქცევის კოდექსის დარღვევის და/ან არამართებული ქცევის ფაქტში შემჩნეული მოთამაშეების ან პიროვნებების შესახებ.

7.2 პიროვნებები უფლებამოსილები არიან მოახდინონ მოთამაშეების და/ან სხვა პიროვნებების მხრიდან სავარაუდოდ მომხდარი თამაშის წესების დარღვევის და/ან ქცევის კოდექსის დარღვევის ან არამართებული ქცევის ინციდენტების დაფიქსირება სათამაშო სივრცეში ან მის მიღმა, იმ პირობით, რომ ეს ინციდენტ(ებ)ი არ დაფიქსირდა მატჩის ოფიციალური პირების მიერ.

7.3 პიროვნებებმა, მოთამაშეების და/ან სხვა პიროვნებების მხრიდან, მატჩის დროს სავარაუდოდ მომხდარი თამაშის წესების დარღვევის და/ან ქცევის კოდექსის დარღვევის ან არამართებული ქცევის ინციდენტების შესახებ წერილობით უნდა მიმართონ, მიაწოდონ სათანადო ინფორმაცია და მხარდამჭერი მონაცემები საითინგ კომისარს ან მის ლიეიზონ ოფიცერს, 24(ოცდაოთხი) საათის განმავლობაში იმ მატჩის დასრულებიდან, რომლის დროსაც ადგილი ჰქონდა აღნიშნულ ინციდენტებს.

7.4 იმ შემთხვევაში, თუ სრკ-ს მხრიდან მატჩზე არ იყო დანიშნული საითინგ კომისარი ან მისი ლიეიზონ ოფიცერი ან ინციდენტს ადგილი ჰქონდა სათამაშო სივრცის მიღმა, პიროვნებებმა, მოთამაშეების და/ან სხვა პიროვნებების მხრიდან სავარაუდოდ მომხდარი თამაშის წესების დარღვევის და/ან ქცევის კოდექსის დარღვევის ან არამართებული ქცევის ინციდენტების შესახებ, წერილობით უნდა მიმართონ, მიაწოდონ სათანადო ინფორმაცია და მხარდამჭერი მონაცემები სრკ-ს სადისციპლინო სამსახურს, მატჩის დასრულებიდან ან სათამაშო სივრცის მიღმა მომხდარი ინციდენტიდან, 48(ორმოცდარვა) საათის განმავლობაში.

7.4<sup>1</sup> თამაშის უფლების არ მქონე მოთამაშის თამაშში მონაწილეობის სავარაუდო ფაქტის შემთხვევაში, პიროვნებებმა წერილობით უნდა მიმართონ, მიაწოდონ სათანადო ინფორმაცია და მხარდამჭერი მონაცემები სრკ-ს სადისციპლინო სამსახურს :



ა) კონკრეტული შეჯიბრების I ეტაპის (რეგულარული ჩემპიონატი) დამთავრების თარიღიდან 48(ორმოცდარვა) საათის განმავლობაში.

ბ) პლეიოფების დროს - კონკრეტული თამაშის დასრულებიდან 48(ორმოცდარვა) საათის განმავლობაში.

7.5 სავარაუდო თამაშის წესების დამრღვევი და/ან ქცევის კოდექსის დამრღვევი ან არამართებული ქცევის ჩამდენი მოთამაშე/პიროვნება არ ითვლება რამენაირად შეზღუდულად, სრკ-ს სადისციპლინო კომისიის მიერ საჩივარის მიღების დადასტურებამდე.

**8. სადისციპლინო და სააპელაციო კომისიების (ე.წ. „სადისციპლინო ტრიბუნალი“) საქმიანობის წესი და უფლებამოსილება, მ.შ. იურისდიქციის სფეროები, პროცედურები და მტკიცებულებების განხილვის წესი.**

ზოგადი :

8.1 სადისციპლინო ტრიბუნალი არის სრულიად ავტონომური; მის მიერ მიღებულ ნებისმიერ გადაწყვეტილებას სავალდებულო ძალა აქვს, ამ დებულებით განსაზღვრული სრკ-ს და მისი სტრუქტურების, სრკ-ს წევრი სუბიექტების, მოთამაშეების და პიროვნებებისათვის. არცერთი მათგანი არაა უფლებამოსილი გააუქმოს ან შეცვალოს სადისციპლინო ტრიბუნალის რაიმე გადაწყვეტილება.

8.2 სრკ-ს სადისციპლინო და/ან სააპელაციო კომისიის წევრები არ უნდა იყვნენ განსახილველ საქმეში რომელიმე მხარესთან რამენაირად დაკავშირებული.

8.3 მტკიცებულების სტანდარტი სადისციპლინო ტრიბუნალის მიერ წამოჭრილ ნებისმიერ საკითხზე ყოველთვის ემყარება ალტერნატივების ბალანსის პრინციპს და წინამდებარე დებულებით განსაზღვრულ კრიტერიუმებს.

8.4 სრკ და სადისციპლინო ტრიბუნალი უფლებამოსილია საჭიროებისამებრ გამოაქვეყნონ მოხსენებები სადისციპლინო საქმეების განხილვის, დასკვნების და სანქციების თაობაზე. სადისციპლინო ტრიბუნალის და სრკ-ს სააპელაციო კომისიის ცალკეულ წევრებს არა აქვთ უფლება მოახდინონ სადისციპლინო ტრიბუნალის მიერ მიღებული გადაწყვეტილებების კომენტირება მედიაში.

8.5 ყველა განხილვა ტარდება დახურული სახით.

8.6 სადისციპლინო ტრიბუნალი უფლებამოსილია:

(ა) დანიშნოს და/ან შეცვალოს საქმის განხილვის თარიღი;

(ბ) გადაწყვიტოს შეიძლება თუ არა მოწმეების ოთახში დატოვება მათ მიერ ჩვენებების მიცემის შემდეგ;

(გ) მოითხოვოს საქმის განხილვაში თარჯიმნის მონაწილეობა;

(დ) გამოიძახოს ექსპერტები ვიწრო სპეციალობით კონსულტაციების უზრუნველყოფის მიზნით;





(ე) მოითხოვოს იურიდიული კონსულტანტის დახმარება;

(ვ) იმსჯელოს გადაწყვეტილების მიღებაზე დახურული კარების მიღმა.

8.7 საქმის წინასწარ და/ან ძირითად განხილვაზე რომელიმე მხარის არდასწრება (წინასწარი შეტყობინების მიუხედავად) არ გამოიწვევს საქმის განხილვის გადადებას.

8.8 სრკ-ს სადისციპლინო კომისიის და/ან სააპელაციო კომისიის ნებისმიერი განხილვა, დასკვნა თუ გადაწყვეტილება წინამდებარე რეგულაციასთან დაკავშირებულ საკითხებზე არ შეიძლება გაბათილდეს მათში რაიმე პროცედურული წესების დარღვევის, დეფექტის, შეცდომის, გამორჩენის ან სხვა ტექნიკური სახის წუნის გამო, გარდა იმ შემთხვევებისა, როდესაც მსგავსი სახის პროცედურული წესების დარღვევა, დეფექტი, შეცდომა, გამორჩენა ან სხვა ტექნიკური სახის წუნი წარმოშობს არსებით ეჭვს სადისციპლინო ტრიბუნალის დასკვნების ან გადაწყვეტილების არსში ან იწვევს უსამართლობას.

8.9 სადისციპლინო და სააპელაციო კომისიების მიერ საქმეების განხილვის მთლიანი პროცესი (კერძო მსჯელობების გარდა) შეიძლება დაფიქსირდეს აუდიო, აუდიოვიზუალური ან სტენოგრაფიული ჩანაწერის სახით. განხილვის პროცესი და მასთან დაკავშირებული მთელი დოკუმენტაცია შესაბამისი პერიოდის განმავლობაში შეინახება სრკ-ს მიერ, რომელიც ვალდებულია მოთხოვნისთანავე წარუდგინოს მსოფლიო რაგბს შესაბამისი დოკუმენტაცია.

8.10 ნებისმიერი საკითხი, რომელიც არაა გათვალისწინებული წინამდებარე რეგულაციით და/ან მის დანართებში, განიხილება ბუნებრივი სამართლის და სამართლიანობის ზოგად პრინციპებზე დაყრდნობით.

## **9. სადისციპლინო სამსახური. დანიშნვის წესი და ფუნქციები**

9.1 სადისციპლინო სამსახური შედგება სადისციპლინო სამსახურის თავმჯდომარის, საფესტივალო ასაკის სადისციპლინო კომისიის, სადისციპლინო სამსახურის წევრებისაგან და საითინგ კომისრებისაგან.

9.2 სადისციპლინო სამსახურის თავმჯდომარეს თანამდებობაზე ნიშნავს და თანამდებობიდან ათავისუფლებს სრკ-ს პრეზიდენტი სრკ-ს გამგეობასთან შეთანხმებით. სადისციპლინო სამსახურის თავმჯდომარის არყოფნის შემთხვევაში (შვებულება, მივლინება, ავადმყოფობა და ა.შ.) მის უფლებამოსილებას ასრულებს სადისციპლინო კომისიის ერთ-ერთი წევრი, რომელიც აირჩევა სადისციპლინო სამსახურის წევრთა მიერ ხმათა უბრალო უმრავლესობით.

9.3 სადისციპლინო სამსახურის თავმჯდომარე ავტომატურად არის სადისციპლინო კომისიის თავმჯდომარე/წევრი.

9.4 სააპელაციო კომისიის თავმჯდომარეს და წევრებს თანამდებობაზე ნიშნავს და თანამდებობიდან ათავისუფლებს სრკ-ს პრეზიდენტი სრკ-ს გამგეობასთან შეთანხმებით. სააპელაციო კომისიის თავმჯდომარის არყოფნის შემთხვევაში (შვებულება, მივლინება, ავადმყოფობა და ა.შ.) მის უფლებამოსილებას ასრულებს სააპელაციო კომისიის ერთ-ერთი წევრი, რომელიც აირჩევა სააპელაციო კომისიის წევრთა მიერ ხმათა უბრალო უმრავლესობით.

9.5 საფესტივალო ასაკის სადისციპლინო კომისია შედგება არანაკლებ 3 (სამი) წევრისგან, რომელთა შემადგენლობას ფესტივალის ორგანიზატორებიდან წარადგენს სადისციპლინო სამსახურის თავმჯდომარე.



9.6 სადისციპლინო კომისიის წევრებს, საითინგ კომისრებს, სადისციპლინო სამსახურის თავმჯდომარის წარდგინების საფუძველზე თანამდებობაზე ნიშნავს და თანამდებობიდან ათავისუფლებს სრკ-ს პრეზიდენტი.

9.7 სადისციპლინო სამსახურის თავმჯდომარე ანგარიშვალდებულია სრკ-ს გამგეობის წინაშე.

9.8 სადისციპლინო/სააპელაციო კომისია შედგება არანაკლებ 5 (ხუთი) წევრისგან. კომისია უფლებამოსილია თუ სხდომას ესწრება არანაკლებ კომისიის წევრთა უმრავლესობა.

9.9 საფესტივალო ასაკის სადისციპლინო კომისია, სადისციპლინო/სააპელაციო კომისია გადაწყვეტილებას იღებს სხდომაზე დამსწრე წევრთა ხმათა უბრალო უმრავლესობით. ხმების თანაბრად გაყოფის შემთხვევაში გადაწყვეტია სხდომის თავმჯდომარის ხმა. გადაწყვეტილებაში აღინიშნებიან ის კომისიის წევრები, რომლებმაც მხარი არ დაუჭირეს უმრავლესობის გადაწყვეტილებას და მათ აქვთ უფლება, კომისიის მიერ გადაწყვეტილების მიღებიდან 3 სამუშაო დღის ვადაში წერილობით ჩამოაყალიბონ თავისი განსხვავებული აზრი, რომელიც დაერთვება სადისციპლინო/სააპელაციო კომისიის გადაწყვეტილებას.

9.10 საფესტივალო ასაკის სადისციპლინო კომისიის, სადისციპლინო/სააპელაციო კომისიის გადაწყვეტილებას ხელს აწერს სხდომის თავმჯდომარე.

## 10. სადისციპლინო კომისიის მუშაობის წესი

10.1 სადისციპლინო კომისია უფლებამოსილია არ მიიღოს საქმე განსახილველად მასში არსებული მტკიცებულებებისა და დამხმარე მასალების არასაკმარისობის გამო და მისცეს მომჩივან მხარეს გონივრული ვადა მათ წარსადგენად.

10.2 განსახილველი საქმის მიღების შემთხვევაში, სადისციპლინო კომისიის გადაწყვეტილების მიღების ვადა არ უნდა აღემატებოდეს 10 (ათი) სამუშაო დღეს.

10.3 სადისციპლინო კომისია, საქმის განსახილველად მიღების შემდეგ, ატყობინებს და აწვდის განსახილველ საქმეში მის ხელთ არსებული მასალების ასლებს სრკ-ს წევრ სუბიექტს, რომლის მოთამაშეს/ პიროვნებასაც ეხება განსახილველი საქმე. სადისციპლინო კომისია საქმის განხილვაში ჩართულ მოთამაშეს / პიროვნებას აძლევს საშუალებას გამოთქვას თავისი თვალსაზრისი, მიიღოს ინფორმაცია მის წინააღმდეგ წამოყენებული ბრალდებ(ებ)ის შესახებ, და წარმოადგინოს თავისი არგუმენტაცია.

10.4 სადისციპლინო კომისიის წევრები უფლებამოსილნი არიან განსაზღვრონ საქმის განხილვის წინა პერიოდის პროცედურები და ჩვენებების მოპოვების წესი, მათ შორის:

- (ა) განხილვის წინა კონფერენციის ორგანიზება განხილვის სხდომისთვის მოსამზადებელი მითითებების გაცემისა და პროცედურების განმარტების მიზნით, და
- (ბ) სათანადო პირებისთვის საქმის გარჩევაზე მოწმის სახით დასწრების მოთხოვნა.

10.5 განხილვის წინა პერიოდში სადისციპლინო კომისიის წევრმა შეიძლება თავად მართოს აღნიშნული პროცესი, სადისციპლინო კომისიის სხვა წევრების ჩართვის გარეშე.

10.6 სადისციპლინო კომისია ვალდებულია ეცადოს საქმის განხილვაზე დაასწრონ მოთამაშე და/ან პიროვნება და/ან მათი წარმომადგენლები. მეორეს მხრივ, წინამდებარე რეგულაციის ფარგლებში სადისციპლინო კომისიას არ ეკრძალება საქმის განხილვის წესის განსაზღვრა და განხილვის განხორციელება იმ შემთხვევაში, თუ მოთამაშე და/ან პიროვნება და/ან მათი წარმომადგენლები საქმის



გარჩევას არ ესწრებიან. თუმცადა საქმის გარჩევა მოცემულ საქმეში ჩართულ მხარეთა დაუსწრებლად დასაშვებია იმ შემთხვევაში, თუ ხსენებული მხარეები უზრუნველყოფილი იყვნენ დასწრების შესაძლებლობით, მაგრამ უარი თქვეს მოცემულ შესაძლებლობაზე საპატიო მიზეზის გარეშე, ან დათანხმდნენ საქმის განხილვას მათი მონაწილეობის გარეშე.

**10.7** სადისციპლინო საქმის განხილვამდე, სადისციპლინო კომისიის წევრები უფლებამოსილი არიან სადისციპლინო რეგულაციების დამრღვევ მოთამაშეს და/ან პიროვნებას:

- (ა) მოსთხოვონ მათთვის საქმის ვითარების შესახებ სრული ინფორმაციის მიწოდება და მოწმეების დასახელება;
- (ბ) მიაწოდონ იმ დოკუმენტაციის ან მოხსენების ასლები, რომლებიც გათვალისწინებული იქნება საქმის განხილვის პროცესში;
- (გ) მოსთხოვონ საქმის განხილვის წინა პერიოდში ან განხილვის პროცესში სათანადო მითითებების შესრულება.

**10.8** მოთამაშეს და/ან პიროვნებას, რომელსაც მოეთხოვება საქმის განხილვაზე დასწრება განსახილველ საქმესთან დაკავშირებულ საკითხებზე პასუხის გაცემის მიზნით, აქვს უფლება დაასწროს საქმის განხილვას თავისი წარმომადგენელი.

**10.9** სადისციპლინო კომისიის წევრები უფლებამოსილი არიან მოიპოვონ ისეთი მტკიცებულებები და იმ ფორმით, რასაც საჭიროდ ჩათვლიან (მ.შ. წერილობითი ფორმით), მოპოვებული მტკიცებულების იურიდიული ვალიდურობის მიუხედავად. ამასთანავე, ისინი უფლებამოსილი არიან შეხედულებისამებრ მიანიჭონ მოპოვებულ მტკიცებულებას განსახილველ საკითხთან მისი მნიშვნელობის ხარისხი.

## 11. მტკიცებულებების სტანდარტი

11.1 მსაჯის, როგორც მატჩის დროს თამაშის წესების მთლიანობის დაცვის ერთადერთი განმსჯელის გადაწყვეტილება ხელშეუხებელია. მსაჯის გადაწყვეტილებები მოედანზე და მათი გავლენა თამაშის შედეგზე ვერ შეიცვლება ან გაუქმდება სადისციპლინო კომისიის მიერ. უკიდურეს გამონაკლისს წარმოადგენს ამ რეგულაციის 12.8 პუნქტში აღნიშნული გარემოება. სადისციპლინო პერსონალის მიერ თამაშის დროს მსაჯის მიერ დაფიქსირებული დისციპლინარული დარღვევის შემდგომი განხილვა, მიზნად ისახავს, წინამდებარე რეგულაციით განსაზღვრული წესებით, დაფიქსირებულ დისციპლინარულ დარღვევაზე შესაბამის რეაგირებას.

11.2 მტკიცებულებების სტანდარტი მთლიანად არის დამოკიდებული იმაზე თუ როგორი იქნება მხარეთა მიერ წარმოდგენილი მტკიცებულებები (ანუ ვინ უფრო კარგად დაადასტურებს ფაქტობრივ გარემოებებს მტკიცებულებებით).

11.3 უპირატესობა ენიჭება საქმესთან პირდაპირ და/ან ირიბად დაკავშირებულ ნებისმიერი სახის დოკუმენტალურ მასალას (მ.შ. აუდიო და ვიდეო მასალები) და განხილვებზე დამსწრე პირებისგან მოსმენილ უშუალოდ მოყოლილ დაკვირვებებს ინციდენტთან დაკავშირებით. გადმოცემით მონათხრობი ასევე შეიძლება მისაღები იყოს როგორც ჩვენება. თუმცადა, გადმოცემით მონათხრობისთვის უშუალო თვითმხილველის ინფორმაციასთან შედარებით უპირატესობის მინიჭება სიფრთხილეს საჭიროებს, ამიტომ, გადმოცემით მონათხრობს შედარებით ნაკლები ძალა აქვს.

11.4 სადისციპლინო კომისიის წევრებმა არ უნდა დაუშვან მტკიცებულებების სახით მოსაზრებების გამოთქმა. ამ თვალსაზრისით, დასაშვებია მხოლოდ ექსპერტის მოსაზრება და ისიც მიზანშეწონილია მხოლოდ იმ შემთხვევაში, თუ ჩვენება სცილდება სადისციპლინო კომისიის ცოდნას.



11.5 იმ შემთხვევაში, თუ საქმე სადისციპლინო დარღვევის შესახებ აღძრულია ერთზე მეტი მოთამაშის ან პიროვნების წინააღმდეგ, ერთი ან რამდენიმე ინციდენტის გამო, ყველა ბრალდებულის საკითხი განიხილება ერთდროულად, გარდა იმ შემთხვევებისა, როდესაც ერთერთ მათგანთან მიმართებაში სახეზეა პრეიუდიცია.

## 12. თამაშის წესების დარღვევის ინციდენტის სიმძიმის შეფასება

12.1 სადისციპლინო კომისიამ უნდა შეაფასოს მოთამაშის ქმედებები თამაშის წესის დარღვევისას და განსაზღვროს მის მიერ ჩადენილი ქმედების სიმძიმის კატეგორია (მსუბუქი, საშუალო თუ მძიმე), რაც წარმოადგენს სათანადო საფუძველს თამაშის წესის დარღვევის კონკრეტული ინციდენტ(ებ)ის განსახილველად. იმ შემთხვევაში, თუ მსგავსი ინციდენტ(ებ)ი ცალსახად გათვალისწინებულია წინამდებარე დებულების **დანართ 1-ში და დანართ 4-ში**. მოთამაშის მიერ ჩადენილი ქმედების სიმძიმის შეფასება ხდება შემდეგი ფაქტორების გათვალისწინებით:

- (ა) იყო თუ არა დარღვევა შეგნებული/წინასწარ განზრახული;
- (ბ) იყო თუ არა დარღვევა წინდაუხედავი - სხვა სიტყვებით, იცოდა თუ არა მოთამაშემ (ან უნდა სცოდნოდა თუ არა მას), რომ არსებობდა თამაშის წესების დარღვევის რისკი;
- (გ) მოთამაშის მიერ ჩადენილი თამაშის წესის დარღვევის სიმძიმე;
- (დ) მოთამაშის ქმედებების ბუნება, მ.შ. რით მოქმედებდა მორაგბე (მაგ. მუშტით, იდაყვით, მუხლით, ფეხით / ბუცით);
- (ე) ჰქონდა თუ არა ადგილი პროვოცირებას;
- (ვ) სურდა თუ არა მოთამაშეს თავისი ქმედებით სამაგიეროს გადახდა და როგორ იყო ეს დროში განაწილებული;
- (ზ) მოთამაშის მხრიდან ჰქონდა თუ არა ადგილი თავდაცვას (ანუ, მოუწია თუ არა მას გარკვეული ძალის გამოყენებით საკუთარი თავის დაცვა);
- (თ) რა გავლენა მოახდინა მოთამაშის ქმედებებმა დაშავებულზე (მაგ. ტრავმის სიმძიმე, დაშავებული მეტოქის მოედნიდან გაყვანა);
- (ი) მოთამაშის/პიროვნების ქმედებების გავლენა მატჩის მსვლელობაზე;
- (კ) დარღვევის ფაქტში ჩართულობის დონე და წინასწარ განსჯის უნარი;
- (ლ) შესრულდა მოთამაშის მიერ განზრახული ქმედება თუ მცდელობით შემოიფარგლა; და
- (მ) დარღვევასთან დაკავშირებული მოთამაშის ქცევის სხვა ნებისმიერი ასპექტი.

12.2 ჩამოთვლილ ფაქტორებთან მიმართებაში დარღვევ(ებ)ის შეფასებაზე დაყრდნობით, სადისციპლინო კომისია ახდენს თამაშის წესის დარღვევის ინციდენტის სიმძიმის კატეგორიზაციას (მსუბუქი, საშუალო თუ მძიმე) და **დანართ 1-ში და დანართ 4-ში** მოცემული სიიდან არჩევს საფუძველს დასაკისრებელი სანქციისთვის.

12.3 იმ შემთხვევაში, თუ დარღვევა შეფასდა როგორც მძიმე, სადისციპლინო კომისიის მიერ დასაკისრებელი სანქციის ხანგრძლივობა განისაზღვრება ნებისმიერი ვადით **დანართ 1-ში და დანართ-**



**4 ში** მოცემული დარღვევისთვის შესაფერის მაქსიმალურ პერიოდსა და ზედა ზღვარის შესაბამის სანქციას შორის.

### შემამსუბუქებელი გარემოებები

12.4 სადისციპლინო კომისია განიხილავს ყველა შესაფერის შემამსუბუქებელ გარემოებას, რათა განსაზღვროს არსებობს თუ არა სანქციის შემცირების საფუძველი.

#### 12.5 შემამსუბუქებელ გარემოებებს მიეკუთვნება:

- (ა) სრკ-ს სადისციპლინო რეგულაციების დამრღვევი მოთამაშის/პიროვნების მიერ დანაშულის/შეცდომის აღიარება და აღიარების დრო;
- (ბ) მოთამაშის/პიროვნების დადებითი სადისციპლინო ისტორია და/ან დადებითი რეპუტაცია;
- (გ) მოთამაშის ახალგაზრდობა და გამოუცდელობა;
- (დ) მოთამაშის/პიროვნების ქცევა საქმის განხილვამდე და განხილვის პროცესში;
- (ე) მოთამაშის/პიროვნების მიერ ჩადენილი საქციელის გამო სინანულის გრძნობის ე.წ. მსხვერპლისთვის დემონსტრირება და ამ დემონსტრაციის დრო; და
- (ფ) ნებისმიერი სხვა შემამსუბუქებელი გარემოება, რასაც სადისციპლინო კომისია მნიშვნელოვნად ჩათვლის.

12.6 წინამდებარე რეგულაციის შესაბამისად, სადისციპლინო კომისიას არა აქვს უფლება თამაშის წესების დარღვევისთვის მოთამაშეზე დასაკისრებელი სტანდარტული სანქცია შეამციროს 50%-ზე მეტით. სანქციის ხანგრძლივობის 0-დან 50%-მდე შემცირებაზე მსჯელობისას, სადისციპლინო კომისია აფასებს შემამსუბუქებელ გარემოებებს.

12.7 იმ შემთხვევაში, თუ დარღვევა, წინამდებარე დებულების თანახმად, შეფასდა როგორც მსუბუქი; ამასთანავე:

- (ა) თუ არსებობს მატჩის შემდგომ მომხდარი რაიმე შემამსუბუქებელი გარემოებები
- (ბ) თუ სადისციპლინო კომისია მიიჩნევს, რომ სანქცია არ შეესაბამება დარღვევის დონეს და ტიპს;

სადისციპლინო კომისია უფლებამოსილია, მოთამაშეზე დასაკისრებელი სანქცია შეამციროს 50%-ზე მეტით, **დანართ 1-ში** და **დანართ 4-ში** განსაზღვრული მსუბუქი დარღვევისთვის დასაკისრებელი დისკვალიფიკაციის სტანდარტულ ვადასთან შედარებით, ან საერთოდ შეიკავოს თავი მოთამაშის დისკვალიფიკაციისგან.



12.8 გამონაკლის შემთხვევაში, სადისციპლინო კომისია უფლებამოსილია ამოშალოს მოედნიდან გამეგების(წითელი ბარათი) ან დროებით გამეგების(ყვითელი ბარათი) ფაქტი მოთამაშის სადისციპლინო ისტორიიდან, მაგრამ მხოლოდ იმ შემთხვევაში, თუ მსაჯის მიერ ბარათის გაცემისას ადგილი ჰქონდა არასწორ იდენტიფიცირებას.

### **დამამძიმებელი გარემოებები**

12.9 მოცემული ინციდენტისთვის შესაფერისი სავარაუდო სანქციის განსაზღვრის შემდგომ, სადისციპლინო კომისიამ უნდა გამოავლინოს და განიხილოს არსებული დამამძიმებელი გარემოებები და განსაზღვროს, არსებობს თუ არა მოცემული დარღვევისთვის დასაკისრებელი სანქციის გაზრდის საფუძველი.

12.10 დამამძიმებელ გარემოებებს მიეკუთვნება:

(ა) მოთამაშის/პიროვნების, როგორც სრკ-ს სადისციპლინო რეგულაციების დამრღვევის, უარყოფითი სადისციპლინო ისტორია;

(ბ) სრკ-ს სადისციპლინო რეგულაციების დარღვევისგან თავის შეკავების ვალდებულება: და

(გ) ნებისმიერი სხვა დამამძიმებელი გარემოება, რასაც სადისციპლინო კომისია მნიშვნელოვნად ჩათვლის.

### **13. ქცევის კოდექსის დარღვევის და არამართებული ქცევის ინციდენტის სიმძიმის შეფასება**

13.1 წინამდებარე დებულებით განსაზღვრული პიროვნების მხრიდან, ქცევის კოდექსის და არამართებული ქცევის ინციდენტის განხილვის შემთხვევაში, სადისციპლინო კომისია ხელმძღვანელობს, იღებს გადაწყვეტილებებს და აკისრებს სანქციებს, **დანართი 2-ში** განსაზღვრული წესების შესაბამისად.

### **14. სანქციების დაკისრება**

14.1 მრავლობითი დარღვევების შემთხვევაში, სადისციპლინო კომისია უფლებამოსილია დააწესოს სანქციები, რომლებიც ამოქმედდება ერთდროულად ან თანმიმდევრულად, ისე, რომ ჯამური სანქცია შეეფერებოდეს ერთად აღებული ყველა დარღვევის სიმძიმეს და თანამდევ გარემოებებს.

14.2 დისკვალიფიკაციის დაკისრებისას, სადისციპლინო კომისიამ უნდა გაითვალისწინოს კვირები, რომლებშიც იმართება ქვემოთ ჩამოთვლილი კრიტერიუმების შესაბამისი მატჩ(ებ)ი:

ა) მატჩი, რომელშიც მოთამაშე/პიროვნება მიიღებდა მონაწილეობას, რომ არა მის წინააღმდეგ აღძრული სადისციპლინო საქმე (იმის დამტკიცება, იქნებოდა თუ არა მოთამაშე მოცემული მატჩის განაცხადში, საბოლოო ჯამში მას ევალება). თუ მოთამაშეს კვირის განმავლობაში უწყევდა ერთზე მეტ მატჩში მონაწილეობა (მაგალითად, შუა კვირაში დანიშნული თამაშის გამო), ასეთი კვირა დისკვალიფიკაციის პერიოდის ფარგლებში მაინც ერთ კვირად ჩაითვლება, გარდა იმ შემთხვევებისა, როდესაც დისკვალიფიკაცია ხდება კონკრეტული ტურნირის ფარგლებში, რომლის წესებიც ითვალისწინებს დისკვალიფიკაციას მატჩების რაოდენობით;

ბ) მატჩი, რომელიც არ წარმოადგენს საერთაშორისო ტურნირის ან მატჩების სერიის ნაწილს, მაგრამ:



იმართება სრკ-ს ორგანიზებით და ყველა წესის დაცვით;

(\*) იმართება ეკვივალენტური სიძლიერის (მაგ. ანალოგიურ დონეზე მოასპარეზე ან მსგავსი სათამაშო სტანდარტების მქონე) ორ გუნდს შორის, რომელიც იგივე ან ეკვივალენტურ დონეზე თამაშობენ და ერთნაირი დონის მორაგბეებით არიან დაკომპლექტებული (და ეს დონე შეესაბამება დისკვალიფიცირებული მოთამაშის დონეს);

(\*\*) იმართება ორივე გუნდისთვის ხელმისაწვდომი უძლიერესი მოთამაშეების მონაწილეობით;

(\*\*\*) იმართება ისეთი ტევადობის და პარამეტრების მქონე სტადიონზე, რომელიც ტიპიურია ასეთი დონის ან სტანდარტის გუნდების თამაშისას;

(\*\*\*\*) ხელმისაწვდომია მაყურებლებისთვის (და, პროფესიული გუნდების მონაწილე თამაშების შემთხვევაში - სტადიონზე შესვლა ფასიანია);

გ) დანიშნულია საერთაშორისო მატჩის, ტურნირის, ტურნეს ან მატჩების სერიის დაწყებამდე 4 კვირით ადრე;

(დ) ფლეიოფი, ფინალი ან მსგავსი თამაში, რომელშიც მონაწილეობის უფლება მორაგბის გუნდს ჯერ არ მოუპოვებია, ჩაითვლება, თუ სადისციპლინო კომისიის მიერ დასკვნის გამოტანის მომენტისთვის არსებობს დიდი ალბათობა იმისა, რომ მოთამაშის გუნდი მსგავსი თამაშის საგზურს მოიპოვებს;

(ე) იმ შემთხვევაში, თუ მოთამაშეს უწევს მონაწილეობა სრკ-ს მიერ ორგანიზებულ რაგბის სხვა სახეობაში (არა იმაში, რომელშიც დისკვალიფიკაცია მიიღო), მაშინ დისკვალიფიკაცია ასევე შეეხება ამ განსხვავებული სახეობის რაგბის ყველა მატჩს, რომელიც დისკვალიფიკაციის პერიოდშია დაგეგმილი. თუმცადა, იმ შემთხვევაში, თუ მოთამაშემ დისკვალიფიკაცია მიიღო რაგბი 15-ის თამაშის დროს, ხოლო შემდგომ პერიოდში მას უწევს მონაწილეობა თამაშის ე.წ. შეკვეცილ სახეობებში, მაშინ დისკვალიფიკაციის ერთ კვირად ჩაითვლება კვირა რომლის დროსაც იმართება თამაშები, რომლებიც წარმოადგენენ სრკ-ს მიერ ორგანიზებულ, ნებადართული ტურნირის ან მატჩების სერიის ნაწილს.

14.3 სადისციპლინო კომისიის მიერ დაკისრებული ფულადი ჯარიმის ოდენობა განისაზღვრება ინდივიდუალურად, დარღვევის სიმძიმისა და შეფარდებული დისკვალიფიკაციის ხანგრძლივობის მიხედვით, გადახდის ვადა არ უნდა აღემატებოდეს 1 (ერთი) თვეს და არ უნდა იყოს 7 (შვიდი) დღეზე ნაკლები.

14.4 სადისციპლინო კომისიის მიერ დაკისრებული ფულადი ჯარიმის დადგენილ ვადაში გადაუხდელობის შემთხვევაში, ვალდებულ მხარეს ეძლევა გაფრთხილება და მიეცემა დამატებითი 10 (ათი) კალენდარული დღე ვალდებულების შესასრულებლად. აღნიშნული ვადის უშედეგოდ გასვლის შემთხვევაში, ჯარიმის გადაუხდელობის ყოველ კვირაზე გუნდს დააკლდება 1 (ერთი) საცხრილო ქულა. ჯარიმის გადახდის ვალდებულება ყველა შემთხვევაში რჩება ძალაში.

14.5 სამოყვარულო და ჭაბუკთა ლიგების გუნდებს, ფულადი ჯარიმის დაკისრების შემთხვევაში, გადახდისათვის ეძლევათ 7 (შვიდი) კალენდარული დღე. გადაუხდელობის შემთხვევაში მათ ავტომატურად დააკლდებათ სადისციპლინო კომისიის გადაწყვეტილებაში აღნიშნული საცხრილო ქულების რაოდენობა.

## 15. სააპელაციო კომისია



## გასაჩივრების წესი

15.2 ამ რეგულაციით განსაზღვრული სრკ-ს წევრები, სრკ-ს წევრი სუბიექტები, მოთამაშეები და პიროვნებები უფლებამოსილნი არიან გაასაჩივრონ სადისციპლინო კომისიის გადაწყვეტილება და დაკისრებული სანქციები. ასეთი სახის საჩივარი განხილვას ექვემდებარება იმ შემთხვევაში, თუ ის წერილობითი ფორმით, დასაბუთებული სახით, წარედგინა სააპელაციო კომისიას, სადისციპლინო კომისიის მიერ მხარისთვის (მხარეებისთვის) გადაწყვეტილების შეტყობინებიდან არაუგვიანეს **72** საათის განმავლობაში, შეტყობინების წესი განსაზღვრულია ამ რეგულაციის მე-17 მუხლით.

15.3 სააპელაციო კომისიაში საჩივარის განხილვის ერთ-ერთი აუცილებელი პირობაა სრკ-ს მიერ დადგენილი სადეპოზიტო თანხის გადახდა.

ა) „დიდი 10“-ში და დუბლიორთა ლიგაში მოასპარეზე გუნდებისთვის (კლუბებისთვის) სააპელაციო კომისიაში გასაჩივრების სადეპოზიტო თანხა შეადგენს 900 (ცხრაასი) ლარს.

ბ) I ლიგის გუნდებისთვის (კლუბებისთვის) სააპელაციო კომისიაში გასაჩივრების სადეპოზიტო თანხა შეადგენს 600 (ექვსასი) ლარს.

გ) რეგიონული და ჭაბუკთა ლიგების გუნდებისთვის (კლუბებისთვის) სააპელაციო კომისიაში გასაჩივრების სადეპოზიტო თანხა შეადგენს 300 (სამასი) ლარს.

დ) ყველა სხვა სრკ-ს წევრების, სრკ-ს წევრი სუბიექტების და პიროვნებებისათვის სააპელაციო კომისიაში გასაჩივრების სადეპოზიტო თანხა შეადგენს **200** (ორასი) ლარს.

- ✓ **განმარტება:** სადეპოზიტო თანხა გადახდილ უნდა იქნას იმ ლიგის მიხედვით, რომელ ლიგაშიც მიიღო გუნდმა (კლუბმა) სადისციპლინო სანქცია.
- ✓ სადეპოზიტო თანხა გადახდილ უნდა იქნას საქართველოს რაგბის კავშირის ანგარიშზე ჩარიცხვის გზით (საბანკო გადარიცხვა).

15.4 საჩივრის შესახებ შეტყობინება წარედგინილ უნდა იქნას წერილობითი ფორმით და დამოწმებული უნდა იყოს მომჩივანის ხელმოწერით, შეტყობინება უნდა შეიცავდეს შემდეგ მონაცემებს:

- (ა) მომჩივანის სახელი;
- (ბ) გადაწყვეტილება, რომლის გასაჩივრებაც ხდება (სრულად ან ნაწილობრივ);
- (გ) გასასაჩივრებელი გადაწყვეტილების თარიღი;
- (დ) მომჩივანის მიერ გასასაჩივრებელი გადაწყვეტილების შესახებ შეტყობინების ოფიციალურად მიღების თარიღი; და
- (ე) გასაჩივრების საფუძველი.

15.5 საჩივრის შესახებ შეტყობინებას თან უნდა ახლდეს წინამდებარე დებულებით გათვალისწინებული დეპოზიტის გადახდის დამადასტურებელი საბუთი.

### სააპელაციო კომისიის უფლებამოსილება

15.6 სააპელაციო კომისია უფლებამოსილია:

- ა) მიიღოს, მხარი დაუჭიროს ან გააბათილოს საჩივარი;





ბ) შეცვალოს სადისციპლინო კომისიის გადაწყვეტილება (მ.შ. შეამციროს, მხარი დაუჭიროს ან გააბათილოს ნებისმიერი სანქცია);

15.7 სააპელაციო კომისია უფლებამოსილია მოიპოვოს სადისციპლინო კომისიის მიერ საქმის წარმოებასთან დაკავშირებული სრული მასალები.

15.8 საქმის გარემოებებიდან გამომდინარე, სააპელაციო კომისია უფლებამოსილია განსაზღვროს საჩივრის განხილვის წესი.

15.9 სააპელაციო კომისია უფლებამოსილია მოახდინოს საჩივრის საფუძვლად ქცეული საქმის ხელახალი განხილვა, სრულად თუ ნაწილობრივ. საქმის ხელახალი განხილვა გამართლებულია მხოლოდ იმ შემთხვევაში, თუ ამ მოთხოვნის მიზანშეწონილობა და საჭიროება დამტკიცდა სამართლიანობის ინტერესებიდან გამომდინარე. იმ შემთხვევაში, თუ მთლიანი საქმის ან მისი ნაწილის ხელახალი განხილვის საჭიროება დასაბუთდა, მტკიცებულებათა წარმოდგენის ვალდებულება და სხვა ვალდებულებები განაწილება იგივენაირად, როგორც სადისციპლინო კომისიის მიერ ჩატარებული პირველი ინსტანციის განხილვის დროს.

15.10 გარდა იმ შემთხვევებისა, როდესაც სააპელაციო კომისია საჭიროდ ჩათვლის მთლიანი საქმის ან მისი ნაწილის ხელახლა განხილვას წინამდებარე დებულების თანახმად, სააპელაციო კომისია ყოველთვის განიხილავს მიღებულ საჩივართან დაკავშირებულ საკითხებს სადისციპლინო კომისიის მიერ გამოტანილი დასკვნებისა და მოპოვებული და განალიზებული მტკიცებულებების საფუძველზე.

15.11 გარდა იმ შემთხვევებისა, როდესაც სააპელაციო კომისია საჭიროდ ჩათვლის მთლიანი საქმის ან მისი ნაწილის ხელახლა განხილვას, აპელაციის წარმდგენს ევალება იმის დამტკიცება, რომ მის მიერ გასაჩივრებული გადაწყვეტილება:

ა) მცდარია (ემყარება მცდარ დასკვნებს ან სცილდება სრკ-ს სადისციპლინო რეგულაციის მოქმედების სფეროს);

ბ) შესაცვლელია სამართლიანობის ინტერესებიდან გამომდინარე;

გ) დაკისრებული სანქციები არაპროპორციულად მძიმეა ან პრინციპულად არასწორია; და/ან

დ) დაწესებული სანქცია არამართებულად ღმობიერია.

15.12 იმ შემთხვევაში, როდესაც სააპელაციო კომისია საჭიროდ ჩათვლის მთლიანი საქმის ან მისი ნაწილის ხელახლა განხილვას, საჩივრის განხილვა მოხდება შემდეგი პრინციპით:

ა) სადისციპლინო კომისიის მიერ საქმის მასალების შეფასება ან გამოტანილი დასკვნები უგულებელყოფილი იქნება მხოლოდ იმ შემთხვევაში, თუკი ისინი აშკარად მცდარია;

ბ) მტკიცებულებების შეფასებები და გადაწყვეტილებები, რომელიც ემყარება წინამდებარე რეგულაციით განსაზღვრულ სადისციპლინო კომისიის თავისუფალ ინტერპრეტაციას, უგულებელყოფილი იქნება იმ შემთხვევაში, თუ სადისციპლინო კომისიამ გადაწყვეტილების მიღებისას იხელმძღვანელა მცდარი პრინციპებით, რამაც შედეგად გამოიღო არასწორი გადაწყვეტილების მიღება; და/ან



გ) ახალ ან დამატებით ჩვენებებს, რომლებიც არ მიეწოდა სადისციპლინო კომისიას, სააპელაციო კომისია განიხილავს მხოლოდ იმ შემთხვევაში, თუ მხარე, რომელიც დამატებით ჩვენებებს წარადგენს, დაამტკიცებს, რომ ეს ინფორმაცია, მიუხედავად ჩატარებული მოკვლევისა, არ იყო ხელმისაწვდომი სადისციპლინო კომისიის მიერ საქმის განხილვის პერიოდში.

15.13 სააპელაციო კომისია უფლებამოსილია განსაზღვროს საქმის განხილვის წინა პერიოდის პროცედურები და/ან ჩვენებების მოპოვებისა და განხილვის წესი, მათ შორის:

ა) საქმის განხილვის წინა შეხვედრის გამართვა განხილვის სხდომასთან დაკავშირებით მითითებების გაცემისა და სხდომის პროცედურების განმარტების მიზნით; და/ან

ბ) ნებისმიერი პირის მოწვევა მოწმის სახით საქმის გარჩევის პროცესში.

15.14 სააპელაციო კომისია ვალდებულია დანიშნოს საჩივრის განხილვის დრო, თარიღი, ადგილი და შეატყობინოს მომჩივანს.

15.15 სააპელაციო კომისიისათვის საჩივრის წარდგენა, წარდგენიდან განხილვის დამთავრებამდე, არ აბათილებს ან აყოვნებს სადისციპლინო კომისიის მიერ მიღებულ გადაწყვეტილებებს და დაკისრებულ სანქციებს.

**15.16 სააპელაციო კომისია უფლებამოსილია:**

ა) შეხედულებისამებრ დაუშვან საქმის გარჩევაზე სხვა პირების დასწრება;

ბ) იმ შემთხვევაში, თუ მოწმე, რომელიც მოწვეული იყო საქმის გარჩევაზე, ვერ ახერხებს ან უარს ამბობს გამოცხადებაზე, სააპელაციო კომისია უფლებამოსილია გადაწყვიტოს დასაშვებია თუ არა ამ მოწმისგან ჩვენების განსხვავებული ფორმით მოპოვება;

გ) განსაზღვრონ დასაშვებია თუ არა ჩვენებების ჩამორთმევის შემდეგ მოწმეების დარბაზში დატოვება;

15.17 სააპელაციო კომისიის მიერ, სადისციპლინო კომისიის გადაწყვეტილების და დაკისრებული სანქციის მთლიანად ან ნაწილობრივ გაბათილების შემთხვევაში, მომჩივანს მთლიანად ან ნაწილობრივ დაუბრუნდება გადახდილი სადეპოზიტო თანხა. სააპელაციო კომისიის მიერ საჩივარის განხილვაზე უარის შემთხვევაში გადახდილი სადეპოზიტო თანხა დაბრუნებას არ ექვემდებარება.

15.18 სააპელაციო კომისიის გადაწყვეტილებები ეცნობება მხარეებს შეძლებისდაგვარად სწრაფად საქმის გარჩევის დასრულების შემდეგ. სააპელაციო კომისიის გადაწყვეტილებები საბოლოოა და სავალდებულოა შესასრულებლად საქმეში მონაწილე მხარეებისათვის. საჭიროების შემთხვევაში, სააპელაციო კომისიამ შეიძლება მოკლედ განმარტოს მიღებული გადაწყვეტილება სხდომის



დასრულებისას(წერილობით ჩამოყალიბებული დასაბუთებული გადაწყვეტილება მიაწოდოს მხარეებს მოგვიანებით).

15.19 მხარეები, რომლებიც წარსდგნენ სააპელაციო კომისიის წინაშე საქმის გარჩევის პროცესში, უფლებამოსილნი არიან მიიღონ წერილობითი დასკვნის ასლები, რომლებსაც სააპელაციო კომისია მათ მიაწვდის შემდგომ დაგვარად მოკლე ვადებში.

## 16. შვიდკაცა რაგბი - ადაპტირებული პროცედურები

16.1 შვიდკაცა რაგბის ტურნირების და მატჩების სერიების უნიკალური სტრუქტურის გათვალისწინებით, შვიდკაცაში წინამდებარე დებულებაში სადისციპლინო რეგულაციებით განსაზღვრულ ინციდენტებთან დაკავშირებით იმოქმედებს შემდეგი ადაპტირებული წესები.

16.2 წინამდებარე დებულების ფარგლებში თხუთმეტკაცა რაგბისთვის გათვალისწინებული ყველა პროცედურა და სტანდარტი ასევე ვრცელდება შვიდკაცა რაგბზე ქვემოთ ჩამოთვლილი ცვლილებების გათვალისწინებით. კერძოდ:

16.3 სანქციების ის ნაწილი რომელიც ეხება მოთამაშის და/ან პიროვნების რაგბთან დაკავშირებული საქმიანობის აკრძალვა/შეზღუდვას გარკვეული პერიოდით, როგორც წინამდებარე დებულების შესაბამის დანართებშია ჩამოთვლილი, დაწესებულია იმ მოსაზრებიდან გამომდინარე, რომ სტანდარტულ პირობებში მოთამაშეს და/ან პიროვნებას დისკვალიფიკაციის ერთკვირიანი პერიოდის განმავლობაში თხუთმეტკაცა რაგბის ერთი მატჩის გამოტოვება უწევს. შვიდკაცა რაგბის ტურნირის დროს კი ერთი დღის განმავლობაში რამდენიმე მატჩში უწევს მონაწილეობის მიღება. დისკვალიფიკაციის პერიოდის განსაზღვრისას, სადისციპლინო ტრიბუნალის წევრ(ებ)მა უნდა გაითვალისწინოს, რომ შვიდკაცა რაგბის ტურნირის ან მატჩების სერიის დროს მოთამაშეს და/ან პიროვნებას შეიძლება მოუწიოს ტურნირის ან მატჩების სერიის მთლიანად გამოტოვება, ვინაიდან დისკვალიფიკაციის პერიოდი კვირებით გამოითვლება, და დააწესოს დისკვალიფიკაცია თამაშების რაოდენობიდან გამომდინარე. ამ შემთხვევაში, სადისციპლინო ტრიბუნალის წევრ(ებ)მა უნდა იხელმძღვანელოს დისკვალიფიკაციის ზოგადი გავლენის მოსაზრებით. ეს პუნქტი არ გამორიცხავს მოთამაშის და/ან პიროვნების დისკვალიფიკაციის პერიოდის ტურნირის დასრულების შემდეგ გაგრძელებას.

16.4 შვიდკაცა რაგბის მატჩის დროს მოთამაშის და/ან პიროვნების მხრიდან დისციპლინარული დარღვევის შემთხვევაში, მისი საქმის განხილვა და გადაწყვეტილების გამოტანა უნდა მოხდეს, შემდგომ დაგვარად, შესაბამისი მატჩის დასრულებიდან 2 საათის განმავლობაში ან იგივე ტურნირის ფარგლებში სხვა მატჩში მონაწილეობის მიღებამდე (რომელიც უფრო ადრე მოხდება).

## 17. კომუნიკაციის ფორმა.

17.1 სადისციპლინო კომისიის შეტყობინებები, სხდომაზე მოწვევები, გაფრთხილებები და სხვა სახის დოკუმენტები იგზავნება მხარის ოფიციალური ან კომისიისათვის ცნობილი ელექტრონული ფოსტის მისამართზე.

17.2 მხარეთა მისამართების, მათ შორის ელექტრონული ფოსტის მისამართის შეცვლის შემთხვევაში, აუცილებელია სადისციპლინო კომისიისათვის აღნიშნულის თაობაზე დროული ინფორმაციის



მიწოდება. წინააღმდეგ შემთხვევაში, შეტყობინება ჩაითვლება გაგზავნილად და ჩაბარებულად, თუკი იგი გაიგზავნა კომისიისათვის ცნობილ უკანასკნელ მისამართზე.

17.3 ელექტრონული ფოსტის მისამართზე გაგზავნილი შეტყობინება მხარის მიერ მიღებულად ჩაითვლება ადრესატის მხრიდან მიღების დადასტურების შემთხვევაში, ხოლო თუ ასეთი დადასტურება არ განხორციელებულა, შეტყობინების გაგზავნიდან 24 საათის გასვლისთანავე.